



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко“ Крыница.

Всіх читателей, котры не вплатили ище пренумераты, просиме выровнати якнайскорше рахунки.

Пренумерата в краю:
30 грошей місячно,
80 „ квартално
1*50 „ полрочно,
3 зл. рочно.

В Амерыці: 1 дол. рочно.

В Чехословакии:

2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошеня малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.

Конто чекове Нр. 404.155.

НЕ ОГЛЯДАЙМЕ СЯ НА НИЧИЮ ПОМОЧ!

В попередном числі Лемка звертали мы ся до наших почтенных читателей с прось-
бом вплатити пренумерату за текучий рок.
До того часу не упоминали мы ся о гроши,
бо здаеме собі справу с того, же каждый
селянин має цілый рок много выдатков;
а лем в осени може мати якы такы доходы.
Прото тыж выбераме осень, яко час
найотвітнійший до выровняня своих ра-
хунков,

Слава Богу, вроды в том року сут красны.
Выросли красны травы и коничи, зародил
ся хліб и не пропали бандуры и капуста.
Тому тыж тішит ся и радує селянин и каж-
дый с них напевно не отмовит в помочи
для нашей учачй ся молодежи. Трудно
памятати о всіх, котры росшмарены по
ріжних містах, кончат там школы. Але ма-
ме в Горлицях нашу бурсу, в котрой живут
школяриky праві с каждого нашего села.
Ест их 42-ох.

А як там дбают и старают ся о них?
Доправды аж мило зайти до бурсы и по-
бесідовати с нима, таке то всьо веселе
и вдоволене. И нич дивного. В бурсі маю-
т діти добрый здоровый корм, маю чисты,
сонечны комнатки и чисту постель, маю
свєє купелеве помещенє, где купают ся
каждой суботы, аджек мают всьо тото, што
ест потребне до удержаня здравя. Не ма-
ют бурсаky также жадных згрызот, бо мают
добрю опеку и присмотр. Слабшим школя-
рам помагат ся в науці, тож всі учат ся
добре, могут отже быти веселы. Веселы
сут бурсаky, — тішат ся их родичи, бо
бурса попринимала их за дешевы гроши.
Але грызе ся заряд бурсы, як то
буде выкормити тоту чередку моло-
дежи.

Турбує ся тым заряд бурсы и дуркат до
милосердных сердец наших селян с прось-
бом о помоч. Под виму треба бурсі дров

на опал, треба бандурок, капусты, гороху,
моркви, бураков, сыра, масла, яйц, зерна
и много инших провиантов. Каждая річ
дана придаст ся и допоможе зарядови
бурсы вывязати ся с принятых на себе
обовязков.

А обовязкы сут великы, бо ведля назна-
ченых цін заряд може собрати от родичей
за бурсаков всьго нецілых 60) зл. місячно,
а удержанє 42-ох школяров коштує 1000 зл.
тож каждого місяца треба доложити 400 зл.,
котрых не даст нам кикто. Тоты гроши му-
симе собрати сами жертвами в провиантах
и готовых грошах. Не жалуйме той жертвы,
бо она верне ся нам сторицею. За тоты
жертвы набере розума наша молодеж, котра
по оконченою школ засилит ряды нашей
трудовой интеллигенции.

СЛУХАЙ НАС, А БУДЕШ БОГАТЫЙ!

Чом давнійше люди не бідовали и было
много таких сел, в котрых каждый господар
мал зложены в касі гроши?

Одчом с причин того богатства народа
было также и того, же люди шановали
и щадили каждый грош и не выдавали его
без потребы. По селах люди жилили ся
плодами выпродукованыма на грунті и оді-
вали ся в одєжу выроблену у себе с волны
або полотна. Гроши выдавал господар лем
на соль и світло и тот выдаток покрывала
звычайно хозяйка с доходов с домашних
птахов. Господар продал волы и свині
и с тых доходов платил податкы, а решту
относил до касы на процент. Так газдуючи
доходил праві каждый до пінязчат и коли
треба было зробити весіле, крестины, або
посвяченє хаты, не грыз ся, откаль возме

гроши, лем ишол до касы, котра му давала
на потребы.

А днеска? Блюзкы, сподничкы, черевич-
кы, пончошкы, светеры, хусточкы, колнірикы,
краваткы и таке инше непотребне — килько
то коштує пінязей? Если бы каждый
господар почислил, килько выдає он сам
на себе и килько его жена, сыны и дочкы,
то переконал бы ся, же без тых выдатков
был бы и днеска паном и не потребовал
бы ся грызти, откаль возме гроши на по-
даткы и другы выдаткы.

**Гроши все будут, але они три-
мают ся лем того кто их шанує
и щадит.** Хотячи не бідовати без грошей,
треба каждый грош нести до касы. Най-
певнійшом касом ест комунальна каса ошад-
ности, бо за ню ручат міста, або повіты
цілым своим маєтком. В комунальных касах
гроши сут певны. Прото тыж, несте
каждый грош

до Комунальной Касы Ошадности в Крыници-Здрою.

Зложены там гроши сут певны. Они там
роснут и можеме их мати в каждой потреби.

Килько людей жиє на Божом світі.

Ведля послідных обчислень, жиє тепер
на землі 2 миллиарды 77 миллионов людей.
Суша поверхня земельной кулі выносит
132 милионы квадратных кильометров, в ви-
ду чого середно припадат на 15-ро людей
на 1 квадратный кильометер. Понятно, ест
то число пересічне, бо в дійности люди
населяют землю сильно неровномірно, ту
густійше, там рідше.

В містах густо, по селах рідко, в Европі
густо, в других частях світа рідко.

В Европі, где населенє ест найгустійше,
припадат на 1 квадратный кильометер 45
людей, а в Австралии лем 1 человек. Не
всі землі сут придатны до населеня. В каж-
дом разі ест ище много місца для людей
на том Божом світі.

Чиима пінязми будовал о. Качмар Україну на Лемках.

Нераз наши люди заходили в голову, откаль тот український згомось со Злоцко-го бере средства на агитацию по наших селах. Мы знали, што Украина ложит великы сумы на утворенє агитаторов, што кру-тят ся по наших селах, але мы не знали, же о. Качмар має ище друге жерело, откаль брал фонды для украинской агитации. Лем тепер, як о. Качмар отышол со Злоцко-го, вылізло шило с мішка.

В церковных скарбонах бранус штоси понад 6000 злотых. Гроши тоты обернено на украинскы кооператывы и на агитацию. Кооператывы задля „доброй“ господаркы зликвидованы, або ликвидуют ся, а платны агитаторы пінязей отдати не хотят, бо повідають — роботу свою зробили. До таких належит п. скубаный „украинець“, што носит кацанску бороду. Взял от о. Качмара с цер-ковной скарбонны штоси 300 зл., отдати не хоче, бо повідат, взяв за роботу. Роботу зробил, бо молодеж в своем селі на Украину збаламутил.

Люды с парохии злоцкой пытают ся, кто за пінязі має отповідати. Наши народны, тяжко зароблены пінязі, котры народ жертвовал на богоугодны ціли, а не на вражу роботу, не сміют пропасти. О. Качмар мусит пінязі положити там, откаль их без-правно взял. О. Качмар має тепер дост пінязей, бо за заслуги для церкви епископ Коцыловский зробил го при собі каноником. Най же тепер оба по совісти порадят о пі-нязі — и тот, што брал и тот, што покрывал и нагороды давал. Як по доброму не поможе, то поможе державный суд.

Лемкы на Словаччині добивают ся своих прав.

Не добре діє ся по другой стороні Кар-патских гор, за Попрадом и на Маковици. Понад сто наших громад чисто рускы не має там школы, бо ани религии в них по рускы не учат. Таке там панує право, же який выкладовый язык в школі, в таком языці вчат и религии. А же школа словац-ко-ческа, то и науку религии учат по словацкы, або по ческы. Наши греко-като-лицкы и православны священники не хотят дітей учити в чужом языці и прото діти остають або без науки религии, або учат их по ческы, або по словацкы панове учителі.

В Пряшеві отбыл ся с'їзд делегатив цілой закарпатской Лемковщины, котрый запротестовал против такой братской „славянской“ политыці чехов и словаков.

Протест отослано до Прагы. Ци што поможе?

Гитлер вшитку біду на світі приписує жидам.

В баварском місті Норымбергі отбыла ся велика парада німецкых „народовых социа-листов“ в присутности канцлера Гитлера. Парады тырвали штоси тыждень и канцлер

пару раз промавлал до народа, котрого собрало ся около 200 тысяч со всіх сторон Німеччины. Канцлер Гитлер в тых бесідах сказал, же вшитка біда днеска на світі от жидов, котры на войні заробили великы гроши и лем они одны их маот. Але тото ище им не выстарчит. Они хотят мати и власть над народом. Достали уж в свои руки Росию, а тепер хотят опановати Испанию.

Гитлер твердит, же при большевизмі добре живут лем тоты, што маот дуже спрыту, а же жиды спритнійши от каждого голя (арийчика), то они знают, же больше-визм, то для них рай и панованє.

Гитлер грозит, же не лем у себе не до-пустит до большевизма, але буде вести бор-бу с большевизмом в других краях, бо не може допустити до жидовского панованя над світом.

Тота угроза Гитлера выкликала сильны спротивы в сусідных державах и во всіх противгитлеровских газетах. Особенно сильно протестуют газеты жидовскы, котры перечат, яко бы всі жиды были больше-виками.

Біда поконаным.

Як світ отвертає ся от бідного, свідчит хоц бы слідуочий факт.

До Женевы на осенну сесию Лиги Наро-дов прихала также делегация абисынска, котрой никто не хотіл прийняти до себе.

Абисынцы звернули ся до ріжных готелей, где давнійше мешкали и ани оден готель не мал отвагы прийняти их. И то не прото, штобы властителі готелей бояли ся о тото, же делегация им не заплатит, лем со страху перед тыма, котры в борбі выказали высшу силу.

С Женевы, котру благородный идеалист Вильсон выбрал на місце пребывания меже-народной справедливости, вышлют в най-близших днях в світ вісти о ріжных ухвалах, мовах, конференциях плянах и т.д.

Але в той самой Женеві не нашол ся никто, кто бы делегацию малого, поконаного тепер народа, котра прихала ту по тото, штобы глядати справедливости, принял до себе и дал ей дах над головою.

Доправды — бідному все вітер в очи!

Собаче и котяче мясо

Рада міста Берна переслала до презыдии рады министров в Празі меморіал, в котром звертат увагу на поглубяючу ся с причины роснучих цін нужду серед населеня Морав.

Консумция коньского мяса в Берні под-несла ся о 15 процент, а тепер в виду недостатка конины появило ся на торговици мясо с собак и котов в ціні по 4 — 5 корон за 1 кг.

На подобне, так пригнобляюче явленє звернено увагу в Злученых Державах Полн. Амер. Нарочный промысел, продукуочий „dog food“ (собачу поживу), котрый до те-пер продуковал корм для псов, — тепер наставил свою продукцию также на . . . людей.

На торгах всіх держав Амерыкы появили ся пушкы с консервами „dog food“, котры масово купує амерыканске населенє.

Зарядженє в справі Ізды на дорогах.

Премієр ген. Славой Складковский выдал обіжник до воєводств и староств, в котром стверджат, же дотепарешны усилия, маючи на ціли приучити населенє перестерігати приписы о руху на публичных дорогах не дали добрых результатов,

Передовсем не перестерігають тоты при-писы фуры, роверисты и поганячи статку, котры Іздыт собі по цілой дорозі и стають ся причиною многих катастроф.

Обіжник приказує воєводствам и старост-вам выдати отвітны зарядженя и точно слідити, штобы тоты зарядженя были перестеріганы.

В случаях иеперестеріганя выданных приписов, а особенно втотчас, коли буде ся певным, же приписы тоты сут знаны, має ся накладати на виновных высокы кары.

Товариство Будовы Народных школ

в воєводствах: краковском и келецком.

На отбытом в Кракові загальном собраню Товар. Поддержкы Будовы Народных школ с округов воєв. краковского и келецкого под председательством посла Похмарского с выголошенных докладов довідуєме ся, же Товариство уділило в послідных часах 975200 зл. позичок на будову и 34250 зл. субвенций на будову школ на теренах заляных водом.

При помочи Т-ва выбудовано на терені округа школьного, складаючого ся с двох воєводств 527 комнат школьных и 52 учи-тельскы помешканя. В текучом року Т-во прелиминує перешло 500·000 зл. на дальшу будову школ.

Товариство числит тепер 31.000 членов. По дискуссии отбыли ся выборы, при чом на місце уступяючого куратора. Гоецкого выбрано председателем ректора Ягайл. Уни-верситета проф. Шафера. До контрольной комиссии вошли: Д-р. Подкувка, Д-р. Гутовский и плк. Мадейский.

В Польщі не любят мыла и воды.

Правильно ктоси сказал, же культуру народа можна зміряти с'ужитым мылом: Народ о высшой культурі с'уживат боль-ше мыла.

В Польщі с'уживат ся мыла мало, бо коли на одного человека рочно припадат в Амерыці 11 1/2 кг. мыла, в Німеччині 10 кг., в Англии — 9 1/2 кг., во Франции — 9 кг., в Италии 6 1/2 кг., в Румунии — 3 кг., то в Польщі лем 2 и пол кг.

При том оказує ся, же в великих містах, где сут водопроводы и где с'уживанє воды можна легко провірити, обнижило ся также в послідных літах с'ужитє воды.

Правда, оправдує тото частично крызыс и біда, але лем частично, бо преця крызыс ест на цілом світі, а однак други народы дбают больше о чистоту своего тіла и одежи.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“

Подумайме о наших луках и пасовисках.

Дивно то єст, же наш господар, помимо того, же любит мати красны коровы, коні и телята, не дбає належито о луках и пасовиска. Тото занедбанє лук и пасовиск стає ся тыж причином неудачи в выхові домашних звірят, котры без доброго пасовиска в літі и без доброго сіна в зимі не могут ся добре розвивати и опасати.

В послідных літах зазначила ся в том напрямі мала поправа. Пришло с помочом правительство, котре (посредством Рольных Палат) дає низкопроцентны и долготерминны позичкы селянам, котры бажають поправити и загосподарити свои луках и пасовиска. Акция тота буде и в будучих літах ведена и прото повинно користати с ней в першой мірі населенє тых сел, где переведено комасацию и где має ся тоты луках и пасовиска в одном фалатку.

Главным недостатком наших лук єст тото, же сут они за мокры. На мокрых луках земля єст заквашена и не перепущат повітря. Росне там мох и квасна, остра трава, котра не має праві жадной кормовой вартости. Луках такы шкода навозити, бо жадны навозы не поправят вроды на таких луках. Такы луках треба доконче осушити и то: або открытыма ровами, або дренами. Дрены могут быти каменны, жердковы або фашиновы. О закладаню дренах писали мы уж в попередном році в Лемку и тепер о том писати не будеме. Зазначає лем, же найлегче єст зроби ти дренах фашиновы, бо при власном материялі кромі роботы нич не коштуєт. Розуміє ся, же найлучше єст осушати цілы партии мокрых лук и прото роботы такы повинны выконати всі сусіды разом.

Досвіды и обсервация выказали, же найкористнійше єст, коли вода на терені луках находить ся через цілый час вегетации в глубині около 60 см., а на пасовиску до 1 метра або и глубше, прото до такой глубины треба копати ровы.

По осушеню луках треба приступити до єй навоженя. Навоженє лук єст таксамо потребне, як и навоженє орного поля, бо ту и там рослины до своего розвита потребують корму. Если того корму не находят, вырастають марно, через што тратит господар. Штобы тото лучше зрозуміти, довідайме ся, же с 1-го морга лук зберат ся при доброй вроді около 25 сотнаров сіна. Тото сіно забераєт со землі, на котрой выросла трава, около 22 кг. вапна, 45 кг. азоту, 49 кг. потасу и 20 кг. фосфору.

Откаль же возьме трава тоты великы количества корму, если не будеме лук навозити? Розуміє ся, же если не даме землі тых навозов, то трава буде штораз планьша и вроды упадут до половины, а кромі того сіно с ненавожених лук має мечьшу вартость, бо бракує єму білка и других кормовых складников.

Прото тыж, если хочеме мати много доброго сіна, штобы сіном кормити живину, а не запыхати єй соломом, котра має барз низку кормову вартость, мусиме луках навозити.

С натуральных навозов найлучшим навозом лучно-пасовисковым єст компост. (Сут то перегнилы отпадкы господарскы, складаны на одну купу. Як робит ся компост, писали мы уж также в Лемку. Припомниме о том ище на весну). Навозиме

ним, в количестві 25 — 37 фур на морг што 5 до 6 літ. Каждый селянин повинен дбати о тото, штобы мати тилько компосту, штобы каждого року хоц лем одну шесту часть лук и пасовиск ним знавозил.

В послідных літах селяне навозят часто луках стаєнным гноєм. Розуміє ся, же стаєнный гной єст добрым навозом и дійствує подобно, як и компост. Так компост, як и стаєнный навоз розмітуєме равномерно по цілой луці и оставляєме так через зиму. Єст то добре и прото, же росшмареный навоз хоронит траву от вымороженя и причиняєт ся до выробленя доброй почвенной структуры. Стаєнного навозу даєме около 16 до 32 фур на 1 морг, в зависимости от выявленя луках.

Перед вымороженєм рослин на луках хоронит также картофляна натица, котра нич не коштує.

Добры результаты дає навоженє лук гнояницом. Гнояница містит в собі азот и потас. Обох тых кормовых складников потребує трава. Але гнояницом навозиме луках найчастійше на весні, або в літі, — в осени лен тоты луках, с котрых хочеме уж барз вчас мати сіно.

Хотячи мати дуже доброго сіна, треба кромі натуральных навозов давати также навозы штучны, о котрых напишем в слідуєчом числі Лемка.

ОПАСАНЄ ГУСЕЙ.

От жолтня начинат ся опасанє гусей. Тырват оно пару неділь, в котрых гуси може причинити ся 2 1/2 кг. На торговиці ціна опасных гусей єст значно высша, прото и робота коло гусей оплачат ся.

В перших 2-ох тыжднях опасаня треба гусь призывчати до приниманя обыльного корму, треба єй росопхати желудок. В той ціли дає ся гусям бандуры, полоу, буракы с додатком 5 — 6 дкг. ячменных отруб. Гуси достають тот корм три раз денно в довольном количестві с полгодинным часом консумции. По двох тыжднях кормит ся уж гуси форсовно знова через два тыждні. Тепер замыкаєме их в клітках, даючи им мішанину, зложеноу с двох частей кукурудзы, 1-ой части татаркы и 1-ой части овса. Гуси в клітці ідыт часто и охотно як лем мають все чисту воду до попиваня и кус піску, або тояченой цеглы, котра им служит до скорого стераня корму.

Опасанє бобальками (клюсками) отбыват ся подобно, але кромі той мішанины, дає ся ище гусям 2 раз денно бобалькы с муки, або с мілкых отруб ячменных, кукурудзых або овсяных. Бобалькы величины малого пальца мачат ся в воді с молоком и впыхат ся гусям 2 раз денно до горла, масуючи при той операции шею гусей, штобы ся не задавили.

Бобалькы даєме в тот способ, же увеличаєме каждого дня порцию. Додатково даєме по два бобалькы рано и вечером, слідуєчого дня подвояєме порцию и так доходиме не раз до 30 штук денно.

По двох тыжднях гусь повинна быти уж добре опасена. Опасанє гусей через опы-

ханє бобальками єст хлопотливе и мучаче для звіряти, особенно, если робит тото кто-си неуміло в метерпеливо. Прото тыж перший способ опасаня гусей єст значно лучший, а результат нич не планьший.

Як переховати яйца на зиму.

Найпростійший способ перехованя яйц на зиму полягат на том, штобы як найменьше воздуха доходило до них. В той ціли укладаєме яйца верствами в деревяной скринці и каждую веству присыпуєме трачовинами. Над горишном верством має быти штонайменьше на пол цяля груба верства трачовин. Повітрє, переходячи через верству трачовин цідит ся неякобы и очищат от бактерий и достаючи ся до яйца, не може выкликати гнитя.

Яйца можна переховати без обавы сопсутя через пару місяцов, як лем сут они добре обезпечены перед высыханєм и дійствієм шкодливых бактерий. Прото при яйцах, назначеных до перехованя треба уважати также и на тото, штобы они мали часту и неушкоджену шкарлупу.

Знаменито переховають ся яйца в водном шклі (купає ся в аптеці). На 1 л. водного шкла бере ся 10 л. воды и в такую мішанину вкладат ся яйца. На копу яйц выстарчит около 4 літры роспушеного водного шкла.

Посуда с яйцами повинна стояти в місци холодном, сухом и продувном. В міру потреби можна их с посуды вынимати.

Люды втічут с колонии.

При теперешной тісноті грунтовой и браку гроша выїзджають люды, где ся лем даєт. Килькадесят родин выїхало до Бразылии и поселило ся на колонии „Agulla Blanca” в стані Еспирито Санто. На той то колонии люды не выдержали и утекли с ней.

В той проклятой колонии шпилі гор, сягають напярду зор, а земля гориста и камениста не надає ся под управу хліба. Тымчасом оголошеня в Польщі заохочали до переселеня ся там и писали, же терен єст фалистый и горбковатый.

Емигрантов, котры утекли с тых негостинных теренов, переселили бразылийскы власти переважно до Ираты, а гдекотрых до стану Сан-Павльо и до Рио-Гранде. Як ся с того показує, треба передом добре провїрити, што нам дають и так аж выберати ся в незнаны, далеку край. Причом можна вірити лем емиграційному Синдыкатови в Варшаві и єго отділам и николи не давати віры прыватным агентам, котры с ріжних причин захваляють нераз тото, чего сами не виділи.

Пророкують остру зиму.

Не лем ластивкы и боцаны преповіли нам вчасну и остру зиму, отлітуючи от нас два тыждні скорше, як по другим рокам. Предсказує тото также славный французский ученый Габриель, котрый твердит, же в том році снігы и морозы начнут ся уж при конци жолтня.

На всякий случай добре єст спомагати ся с полевыми роботами и прирыхтовати дырва на опал.

Што чути в світі.

В китайській провінції Шехпан ширит ся голод, якого не мотвала ніще історія Китаю. Місцеві влади подають, же в наслідок голодової смерті умерло там в недалгом часі 15 мільйонів людей. Сотні тисяч китайців живит ся уж от кількох місяців дерев'яном корем, травою и коренями, а в гдекотрых місцевостях людя їдять людське м'ясо. Цілы родимы пополняють там самоубийства, штобы уйти мук голодової смерті.

Берлин: Німецькі газети подають, же в іспанській домашній війні єст убитых 51 тисяч людей, с чого 16 тисяч пало жертвою езекуції. Число раменых по обох сторонах вынесит 168 тисяч.

Єрусалим: Штаб арабських повстанців подає, же в виду вскріплення англійських гарнізонів в Палестині арабы перестанут бороти ся оружно аж до часу, коли англійки цофнут выданы зарядженя. Индивидуальны терорыстичны атавы будут ведены однак дальше.

С Каіро довосят, же малый прогульковий корабель на Нилу, везучий 200 людей ударил о сильний торговельный корабель и затонул. 196-єро люда нашло смерть в нідрах ріки Ниль. Лем 4-ро людей потрафило ся выратувати.

В Льеж в Норвегії обсунула ся гора, котра присыпала три села. 80 люда земля привалила.

Совітське правительство намірять збудувати новых 5000 тысяч транспортных аеропланов. В виду того большевицка армия буде літати в повітря.

Нью Йорк: Американы політыкы обчисляють, же тогорочны выборы президента будут коштовати 17 мільйонів долларів.

В Мадрыті робят приготвлення до обороны перед повстанцями. На предмістях будуєт ся барикады и окопы. Мадрытське правительство робит приготвлення евакуації до Валенції. Правительство, числячи ся с опанованєм міста через повстанців, рішило перед уступленєм со столицы высадити динамитом в воздух всі рядовы будынкы и институты. В Мадрыті выдають хліб на карткы.

Париж: Іспанскы правительственны войска высадили в воздух старинный мавретанский замок Альказар, в котром через 8 неділь боронило ся 1000 прапорщиків. Сила выбуху была так страшна, же робила враженє выбуху вулькана. В замку згинуло 1000 людей.

В Женеві начала ся осенна сесия Лиги Народов. На засіданє приїхала также абисинська делегация. Рада Лиги Народов выбрала верыфикаційну комисию, котра має оречи, ци абисинскы мандаты сут важны. Комисия отдала тоту справу международному трибуналову в Гагі

Женева: Комисия верыфикаційна рішила признати абисинскы мандаты за важны и допустити делегацию на засіданє Лиги

Народов. Сесия Лиги Народов отбиват ся без участы Италиі.

Женева: В звязи с сесієм Лиги Народов приїхал до Женеви негус. Подорож с Лондону до Женеви отбыл самолетом.

Москва: Теперешны припасы золота в Совітах сут обчислены на суму 200 мільйонів фунтов штерлингов (52 мільярды золотых).

Берлин: В Німеччині дає ся отчути зас недостаток толщу. Офіціальны кругы радят їсти меньше толщу и заступити толщ хлібом, кашом и цукром.

Бруксолья: В Бельгії выкрыла полиция заговор оружного комунистичного переворота. Слідство выказало лучность бельгійской социялистичной партии с Троцкым.

Париж: Финансове положенє Италиі єст плачне. Италианське правительство робит стараня, штобы одержати позичку в Америкі. Буде то дост трудно, бо американы піняжны рынкы закрыто для всіх держав, котры не платят воєнных долгов.

Поплатный фак: Ведля статыстыкы оголошеной в Америкі, доконано там в одном року 67.612 рабунковых нападів, 283.685 влamanь, 247.710 крадежей автомобилей и 800.000 инших крадежей.

Рочный луп преступников выносит 5 мільярдів долларів. Бандытизм в Америкі єст поплатным факом и осягнул великы, на правду американы розміры.

Одеса: С Одесы отплынул до Италиі корабель с 2.000 тон провиантов, закупленых за гроши, собраны серед совітских женщин.

До Барцельоны мало прилетіти дотепер 200 совітских самолетов с обслугом. Мають быти самолеты ловецкы, бомбардуючи и транспортовы. На транспортных самолетах перевезено ряд панцерных самоходов, 25 самолетов отлетіло сейчас до Мадрыта. В Мадрыті владовано около 7 тысяч машинных карабинов.

ПОВІДОМЛЕНЄ.

Ректорат Ченстоховской духовной Семинарии в Кракові повідомляг, што академіцкый рок в тойже Семинарии начне ся **5 жолтня 1936.**

Интересованы богословы с Лемковщины мають того дня явити ся лично в Ректораті той Семинарии. (Ул. Бернардынска 3.)

Вісти с краю.

Варшава: Дня 17-го вересня выїхал до Женеви на засіданє Лиги Народов министр заграничных діл Осиф Бек.

Варшава: „Dziennik Polski” доносить, же Винкентий Витос, котрый дотепер мешкал в Чехословакии, переселил ся на сталый побыт до Женеви.

До Варшавы вернул кпт. Янош и пор. Бренк, котры на балюні „L. O. P.” опали на землю в Архангельской тундрі.

Краков: В Нездові коло Величкы дня 19. вересня вечером вдерло ся до помешканя млынара Гольдфингера 2 або 3 ох бандытов вооруженых в револьверы и зажадало выдана грошей. В виду того, же грошей им не выдано, начали они стріляти и убили жену Гольдфингера, 2 дочкы, сына и служащу. Гольдфингера и паробка тяжко ранили. Паробок умер другого дня. Слідство выказало, же служаща ударила бандыту погрібачом. Недалеко от млына найдено трупа одного бандыта. Видно застрілили єго товариши. Назвиско бандыта усталено. За другыма заряджено погоню.

Бандыты забрали 8 злотых.

СВЯТО В ВЕРХОМЛІ ВЕЛИКОЙ.

В неділю дня 11 жолтня 1936. о год. 2-гой по полудни отбуде ся в Верхомлі Великой ново-сандецкого повіта.

ПОСВЯЧЕНЄ

УГОЛЬНОГО КАМЕНЯ

под дом чит. им. М. Качковского.

Програма:

1) О год. 2-гой збор под читальчєм.
2) Поход на кладбище, где под памятником повішених Мучеников отслужит ся панихиду и выголосит ся промовы.

3) Поворот на площу чит., где торжественно заложит ся угольный камень.

Вечером представленє.

О масову участь доокрестного населеня просит.

Правленє чит.

**КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТНУЖДЫ И ГОЛОДА, АБО ЗЛОЖИТИ ДІТЯМ ВІНО,**

НЕХАЙ ЯКНАЙСКОРШЕ

заасекурує ся

в асекураційном Товаристві

**ВИТА И КРАКОВСКЕ
во ЛЬВОВІ**

Асекурацію принимают на цілой Лемковщині

представителі: гг. Осиф Яновицкый — Крыница-Село и Михаил Перелом — Сянок.